

# INUIT ATAQATIGIIT INATSIARTUNI



UPA2023/62  
9. maj 2023  
Adam Kristensen

**Innuttaasunut, aalisartut, piniartut savaatillillu inuussutissarsiorlutik ingerlatsinerminni silap allanngoriartorneranut attuumassutilimmik ajunaarnersuarmut assingusumik eqqugaasut aningaasatigut ikiorserneqarnissaat siunertaralugu Naalakkersuisut Aningaasanut Inatsimmi kontumik nutaamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Kontumik pilersitsinerup peqatigisaanik kattuffiit attuumassuteqartut suliamut akuliutsinnerisigut ikiorsiisarnermik aaqqissuussinermut periusissanik aalajangersaanissamik Naalakkersuisut suliaqassapput, tamanna kontumi pingaarnermi oqaasertaliinikkut imaluunniit namminerisamik inatsisissatut siunnersuuteqarnikkut pissaaq.**

(Inatsisartunut ilaasortaq Agathe Fontain, Inuit Ataqatigiit)

## **Oqaaseqaat:**

Qangaanerusoq siuligut inuutissarsiumminnik ingerlassiniarnerminni pinngortitarsuup nukissuinik akiuniartarsimapput allanik isumalluuteqaratik, piniakkat kisimik isumalluutaangallarmata, taamatuttaaq savaateqarneq nunatsinni ingerlanneqalermaat pinngortitarsuup silap pissusaata allanngorarnertigut eqqornerlunneqartarsimapput, ukiunilu kingullerni sinerissap qanittuani aalisarneq ingerlanneqalermaat ajornartorsiut annertusimavoq silap atungarliortitsisarnera.

Pisortatigoortumik paasineqarsimalerpoq silap pissusaa allanngoriartortoq, eqqornerusumik oqaatingalugu kissakkiartortoq, tamatumali kingunerisaanik anorersuit silarlummik nassartut qangaaniit akulikinnerullutik takkuttalerput, imaatigut inuutissarsiortunik mikinerusunik angallateqartunik akiorneqarsinnaasaratik, ullut malittuinnaat taamaaleraangat inuutissarsiortut aningaasatigut inuussutissatigullu ajornartorsiulersarput.

Ukiuni kingullerni ajornartoorfiup nalaani ikiorsiiniarneq assut paamaarunneqartarsimavoq, ajornartoortoq qanoq ikiorserneqassanersoq inatsisatigut tunngavissinneqarsimangimmat. Inuit Ataqatigiinni isumaqarpugut inuutissarsiummik ingerlataqartut taamatut atungarliuteqartarnerat qaangiuttariaqalersoq.

# INUIT ATAQATIGIIT INATSIARTUNI



Ukioq kingulleq misigilluarparput pingaartumik imaani inuutissarsiuteqartut pisortanut saaffiginnittaraluartut ikiorserneqarnissaat qanoq ajornartigisimasoq, taamaammattamanna ilinniarfingalugu Inuit Ataqatigiinni siunnersuuteqartup toqqammavilersuutigisaa tassa kontomik piniartunut aalisartunut savatilinnullu ikiorsiisarfissamik pilersitsinissaq pisariaqartutut isingalugu tapersersungaarparput.

Periarfissaq alla eqqaaneqarsinnaasoq tassavoq (Ajunaarnersuarmut Aningaasaateqarfik) taanna aningaasaateqarfik ajunaarnersuaqartillugu atorneqartussaavoq, soorunami Inuit Ataqatigiinni soqutigivarput ajunaarnersuaqartillugu pisortatigoortumik aningaasanik sillimmateqarnissaq itinerusumik eqqartorutsigu, periarfissaq tassaniittoq inatsisitigut naleqqussaaniikkut immaqa tassunga siunertamut pulatinneqarsinnaangaluartoq.

Ersarinnerusumik oqaatingalugu aningaasaateqarfik Nunalerinermut Savaatilinnut Piniartunut Aalisartunullu, silap pissusaata allanngoriartornerata kingunerisaanik inuutissarsiummik ingerlassisinnaajunnaartunut ikiorsiisarfittut ajunaarnersuarmillu eqqungaasunut atorneqarsinnaasunngorlugu.

Taamatut oqaaseqarluta ataatsimiitsitaliamut susassaqartumut ingerlatipparput.